



A su Presèpiu

1° pitzinnu:

Ciao Gesùs, nois puru semus bènnidos a ti salutare!

2° pitzinnu:

Ti cherimus bene meda e semus cuntentos de istare afaca a tie.

3° pitzinnu:

Tue intendes sa boghe de su coro nostru.



4° pitzinnu:

Deo t'apo batidu custa camisedda de fradigheddu meu.

5° pitzinnu:

E deo cun sas prumas de una puddighina t'apo fatu unu cabidale, gasi non pones prus sa conchighedda tua subra sa pàgia.



6° pitzinnu:

Custa careta de lana ti podet bisongiare, Gesùs... Ses gasi pòberu...

7° pitzinnu:

Deo apo chircadu in domo ma no apo agatadu nudda a ti batire... Tèngio custa caramella ebbia, no l'apo mancu assagiada. Lea, ti la regalo: est bona meda!



8° pitzinnu:

Deo tèngio custa trumbita, ascurta comente sonat! Ti la dao gasi podes giogare cun sos àteros pitzinnos.

9° pitzinnu:

T'apo preparadu custa corbuledda, cun pabiru chi paret de prata. L'aia chèrfidu prenare de frores ma est faghende fritu meda e in s'ortu non nd'apo agatadu mancu unu.

Nostra Signora:

Sos frores de su coro non morint mai!

1° pitzinnu:

Custu est su frone de sa bontade, de su bonu coro e de sa gentilesa.




2° pitzinnu:

Custu est su frore de sa paghe e de sa cuncòrdia.

3° pitzinnu:

Custu est su frore de s'ubbidientzia e de sa bona voluntade.



4° pitzinnu:

Custu est su frore de sa caridade e de s'umiltade.

5°, 6°, 7°, 8°, 9° pitzinnu:

Gesùs, agiua-nos a èssere semper prus bonos pro nos assimigiare a tie!

TOTUS:

Chi sos frores de su coro nostru non mòrgiant mai!

Bona Pasca de Nadale a totus!

